

Powšitkowne WOZJEWJENJA

njedźelu, 29. měrca 2026

Přiležnosć k swjatej spowědži w Róžeńće

póndźelu, 30. měrca	farar M. Anders, farar G. Nawka,
18.30 – 19.30 hodź.	farar M. Kleiner
wutoru, 31. měrca	farar M. Anders, farar G. Warnar,
18.30 – 19.30 hodź.	pater J. Müller

Kóždy sobotu do Božej mše za lud a kraj, kotraž so we 8.00 hodź. započina, je přiležnosć k swjatej spowědži.

Křižowy puć dekanatneje młodžiny

Křižowy puć dekanatneje młodžiny budže tutu njedźelu, bołmončku, 29. měrca, we Łazku. Započatk je w 14.00 hodź. při Kulturnym domje. Jednotliwe wosadne młodžiny njech přinjesu swój młodžinski baner sobu. Trěbna digitalna knižka za křižowy puć je na internetowej stronje dekanatneho dušepastyrstwa přistupna.

Pasionske předstajenje jako film we wosom rěčach

Wotnětka móža sej zajimcy pasionske předstajenje „Sćěhuj mje!“ ze septembra 2025 jako film wobhladać. Zestajeli su jón pod nawodom Michała Cyža w studiju Lucija. Wot pjatka, 27. měrca, wječora je wón pod www.lucija.de online přistupny. Wotkaz na njón je tež pod www.posol.de podaty. Kaž Michał Cyž zdžěli, předleži film we wosom rěčach: serbsce, němsce, jendźelsce, španisce, francosce, italsce, česce a pólsce. Štóz ma swój ličak na němsku rěč nastajeny, měł sej serbsku wersiju wupytać, zo by film w originalnej rěči pasionskeho předstajenja sćěhować móhl. Němski přeložk je po tym přewzaty, kaž su jón rěčnicy za němskich hosći w Chróscicach w rolach přednjesli. Tamne přeložki su syntetisce produkowane, tež z pomocu kumštneje inteligency. Tak su to wopytowarjo kongresa Europasion loni srjedy septembra w Chróscicach tohorunja slyšeli.

Meditatiwny wulki pjatk z Mozartowym rekwiemom

Smochčanske kubłanišćo swjateho Bena přeprošuje wulki pjatk, 3. apryla, w 19.30 hodź. na meditatiwny wječor do tamnišeje cyrkwe. Smyčkowy kwartet Budyskeho Serbskeho ludoweho ansambla interpretuje Wolfganga Amadeusa Mozartowy rekwiem, kiž ma při-poslucharjam na hudźbne wašnje žarowanie, tróšć a nadźiju sposrědkować. Krótke čitanja přednjesu w běhu rekwiema w serbskej a němskej rěči. Slowo a zwuk chcedža do sensibelneho dialoga stajić a městno skićić, kiž so z ćišinu, rozmyslowanjom a zhromadnym wopominanjom wupjelnuje. Tikety předawaja w interneće – wotkaz je pod www.posol.de podaty – kaž tež při wječornej kasy.

Njedźelne wodženje w Serbskim muzeju

Wosebite wodženje po galeriji tworjaceho wumělstwa poskičuje Budyski Serbski muzej njedźelu, 29. měrca, w 16.00 hodź. w němskej a w 17.00 hodź. w serbskej rěči. Direktor-ka Christina Boguszowa njepředstaji jeničce twórby, ale tež wumělcow a jich stawizny.

Jutrowne wiki w Serbskim muzeju

Ludowi wuměłcy wustajeja a předawaja wot wulkeho pjatka do jutrowneje pónđzele, 3. do 6. apryla, stajnje wot 10.00 do 18.00 hodź. w Budyskim Serbskim muzeju jutrowne jejka. Wone su we wšelakich serbskich debjenskich technikach zhotowjene.

Křižowy puć w Jiřetínje pod Jedlovou

Na rozpominanje křižoweho puća z tekstami českeho basnika Milana Hrabala su wěriwi a zajimcy wulki pjatk, 3. apryla, w 15.30 hodź. do českeho Jiřetína pod Jedlovou njedaloko Varnsdorfa přeprošeni. Budu-li hosćo z Łužicy přitomni, přednesu wurězki tekstow tež w serbskej rěči.

Časy křižerskich procesionow

Na internetowej stronje Katolskeho Posoła www.posol.de su časy a čary křižerskich procesionow wozjewjene. Jeli někomu něšto napadnje, štož by so změnić měło, njech to prošu najručišo redakciji pod telefonowym čisłom (0 35 91) 55 02 10 abo z mailku na Katolski@Posol.de zdžěli, zo by k jutram wšo korektnje było.

Zawod do tematiki lětušich nabožnych prózdninskih dnjow

Drježdžansko-Mišnjanske biskopstwo poskićuje tež lětsa zaso zawod do tematiki nabožnych prózdninskih dnjow. Přenje tajke zarjadowanje budže pónđzeli, 11. meje, wot 18.00 do 21.00 hodź. na Budyskej farje. Dalše je mjez druhim srjedu, 27. meje, w Drježdžanach planowane. Zdobom poskića zamołwići zawod tež online přez platformu Zoom, a to štwórtk, 28. meje, wot 18.00 do 21.00 hodź. Přizjewjenja přijimuju online. Link k tomu kaž tež k dalšim informacijam je pod www.posol.de podaty.

Prózdnińska jězba za 4. do 8. lětnik

Na jězbu do Zhorjelca su šulerki a šulerjo nětčišeho 4. do 8. lětnika w lětnich prózdninach přeprošeni. Wona wotměje so wot pónđzele do pjatka, 3. do 7. awgusta. Swójški přinošk na wobdžělnika wučinja 130 eurow. Přizjewjenja přijimuju hač do pjatka, 1. meje, online. Link na wotpowědnu stronu je pod www.posol.de wozjewjeny.

Wukubłanje na měšnika

Mužoj, kotřiž chcedža teologiju studować a so z měšnikom stać, móža so wot nazymy we wobłuku studija na to přihotować. Tež mužoj bjez matury, ale z wotzamknjenym powołanskim wukubłanjom móža so na puć měšnistwa podać. Do požadanja wotměja so w biskopskim ordinariaće w Drježdžanach orientaciske rozmołwy, za kotrež měli so zajimowani mužoj w personalnym wotrjedže přizjewić. Požadanja za wukubłanje su tam hač do pjatka, 17. apryla, móžne. Link k nadrobnišim informacijam a požadanskim podložkam je pod www.posol.de podaty.

Wukubłanje na stajneho diakona w ciwilnym powołanju

Lětsa nazymu zahaja na Fachowej akademiji za wosadnu pastoralku w Magdeburgu nowy wukubłanski kurs za muži, kotřiž chcyli so ze stajnym diakonom w ciwilnym powołanju stać. Wukubłanje absolwować móže kóždy, kiž ma mjez druhim wotzamknjene wukubłanje powołanja kaž tež teologiskeho dalokokursa „Křesćanska wěra: zakładny kurs“ Domoweje šule we Würzburgu, je fyzisce a psychisce počezomny a je kmamy a zwólniwy so z nuzu druhich rozestajeć. Zajimcy měli při zahajenju wukubłanja znajmjeńša 35 lět być a nic starši hač 50 lět. Woni móža so w personalnym wotrjedže biskopskeho ordinariata w Drježdžanach za orientacisku rozmołwu přizjewić. Po tym budže rozsudžene, hač so požadanski proces zahaji. Požadanja přijimuju tam hač do pjatka, 17. apryla. Link k nadrobnišim informacijam a požadanskim podložkam je pod www.posol.de wozjewjeny.

Wukubłanje za pastoralnu službu we wosadže

Zajimcy, kotřiž chcyli pastoralnu službu we wosadže wukonjeć, móža lětsa nazymu wukubłanje na wosadneho referenta zahajić. Žony a mužojo, kiž tak mnohostronske služby a charismy wěriwych podpěraja a spěchuja, móža so ze studijom nabožneje pedagogiki respektiwnje teologije a nawjazowaceho třilětneho wukubłanja za tajku službu kwalifikować. Zajimowane wosoby měli so na personalny wotrjad biskopskeho ordinariata w Drježdžanach wobroćić, hdžež wotměje so do móžneho požadanskeho procesa orientaciska rozmołwa. Požadanja přijimuja tam hač do pjatka, 17. apryla. Dalše informacije nańdu zajimcy pod www.posol.de.